

Idea tubuh pusat serantau perlu diteliti

BH 3 AUG 2002

KUALA LUMPUR, Jumaat - Kerajaan diingatkan supaya meneliti secara mendalam cadangan Amerika Syarikat memilih Malaysia untuk menubuhkan pusat serantau menentang keganasan kerana bimbang negara diheret ke dalam agenda tersembunyi kuasa besar itu.

Kebimbangan itu disuarakan Ketua Jabatan Pengajian Antarabangsa dan Strategik Universiti Malaya Prof Datuk Mohamad Abu Bakar dan Presiden Pergerakan Keadilan Sedunia (Just), Dr Chandra Muzaffar.

Prof Mohamad berkata pusat seumpama itu jika diwujudkan, perlu terhad sebagai platform bagi berbincang dan bertukar-tukar maklumat mengenai keganasan.

"Kebimbangan kita adalah pusat serantau ini hanya akan menumpukan usahanya kepada pergerakan Islam yang radikal dan yang mudah ditafsirkan sebagai 'terrorism'.

"Ia amat membimbangkan kerana daripada perlakuan dan perkembangan terakhir amat jelas menunjukkan kepada kita mengenai kecenderungan untuk mengaitkan keganasan antarabangsa dengan pergerakan Islam yang radikal," katanya kepada Bernama dalam temuramah eksklusif di sini hari ini.

Selasa lalu, Setiausaha Negara Amerika Syarikat Colin Powell yang dalam rangka lawatan diplomatik ke rantau ini pada pertemuannya dengan Menteri Luar

Datuk Seri Syed Hamid Albar mencadangkan agar kedua-dua negara menubuhkan pusat serantau bagi usaha membanteras keganasan.

Syed Hamid berkata pusat serantau yang dicadangkan itu akan berpusat di Kuala Lumpur serta dikendalikan pegawai Malaysia dan Amerika Syarikat.

Perdana Menteri Datuk Seri Dr Mahathir Mohamad ketika diminta mengulas mengenai cadangan itu berkata Malaysia perlu meneliti cadangan berkenaan.

Prof Mohamad berkata Malaysia perlu memastikan pusat serantau itu kelak tidak menjadi medan bagi Washington untuk memperjuangkan dasar yang akan menjejaskan Malaysia dan rantau Asean keseluruhannya.

Pusat serantau anti-keganasan yang berpusat di Kuala Lumpur itu juga kata beliau, harus membabitkan semua 10 negara Asean agar Malaysia tidak ditonjolkan oleh rakan-rakannya di rantau ini sebagai "boneka Amerika Syarikat".

"Imej itu (boneka Amerika Syarikat) telah pun diberikan kepada Singapura dan Filipina. Apakah kita perlu meraih imej yang serupa?" soal Prof Mohamad.

Kewuiuduan pusat serantau itu, me&rut beliau, juga boleh memberi imolikasi buruk dari segi imej Malaysia pada pandangan negara Islam yang diketahuhi tidak menerima dengan baik peperangan menentang keganasan yang diketuai

Amerika Syarikat.

Negara Islam, kata Prof Mohamad, mungkin melihat penubuhan pusat serantau itu sebagai s&u daripada usaha pentadbiran Presiden George W Bush untuk membanteras kebangkitan Islam di rantau Asia Tenggara.

"Jika pusat serantau yang digembar-gemburkan itu menjadi kenyataan dengan Kuala Lumpur menjacli tuan rumahnya, negara perlu berusaha merangkannya pada negara Islam agar ia tidak disalahertikan," katanya sambil mempersoalkan mengapa Powell memilih Malaysia dan bukan sekutu rapat Amerika Syarikat di Asean, iaitu Filipina dan Singapura.

Pemilihan Malaysia, kata Prof Mohamad, mungkin disebabkan kejayaannya membanteras ancaman penganan atau menandakan kebimbangan Washington terhadap kewujudan mereka yang disyaki penganan di negara ini.

"Mungkin mereka (Amerika Syarikat) masih mencurigai Malaysia sebagai sebuah sarang atau laluan penganan antarabangsa," katanya.

Awal tahun ini, beberapa media utama Amerika Syarikat mendakwa Malaysia sebagai pusat merancang peristiwa 11 September yang mengorbankan lebih 3,000 rakyatnya, disebabkan beberapa perancang utama kejadian itu telah bertemu di Kuala Lumpur.

Presiden Pergerakan Keadilan Sedunia (Just), Dr Chandra Muzaffar, pula mempersoal-

kan sama ada pusat itu mempunyai kebebasan serta keberanian untuk menekankan kepentingan menggubal dasar yang lebih saksama pada peringkat serantau dan antarabangsa bagi membanteras punca yang menyebabkan berlaku keganasan.

Beliau bimbang kemungkinan pusat itu akan menjadi satu lagi alat bagi Washington mencapai agenda memperluaskan kuasanya jika pusat yang dicadangkan itu tidak berupaya berbuat demikian.

Dalam kenyataannya hari ini, beliau berkata, Amerika kini sudah pun memanipulasikan isu keganasan untuk mengembangkan kuasanya di seluruh dunia.

Sejak peristiwa 11 September, katanya, Washington meletakkan negara Asia Tengah secara terus di bawah kawalannya menerusi tindakan ketenteraan dan penubuhan pangkalan tentera di tiga negara di rantau itu.

Beliau berkata, Amerika juga mencari alasan bagi kehadiran tentera di sebuah lagi negara di Asia Tengah, menyambung semula fungsinya di Asia Tenggara serta mendapat faedah penuh akses kepada sistem keselamatan dalam di beberapa negara di seluruh dunia.

"Hari ini, selepas peperangan di Afghanistan dan paktian ketenteraan palsu yang baru di Tajikistan, Uzbekistan, Kyrgyzstan dan Kazakhstan,

Washington kini berupaya menguasai minyak di rantau Laut Kaspian.

"Menjelang 2010, rantau itu dianggarkan menghasilkan 2.3 bilion tong minyak mentah sehari, sama dengan keluaran Arab Saudi ketika ini, sebagai tambahan kepada 4,850 bilion kaki padu gas asli setahun. Ini menunjukkan ada unsur penguasaan ekonomi di sebalik perang keganasan Amerika," katanya.

Sementara itu, penganalisis hubungan antarabangsa Jatswan Singh percaya pusat serantau yang dicadangkan itu tidak akan hanya tertumpu kepada usaha pembasmian keganasan tetapi meliputi jenayah melepasi sempadan.

Katanya, jenayah seperti penyeludupan senjata, pengedaran dadah dan penyeludupan manusia termasuk di dalam rangkaian lebih luas yang turut diceburi oleh kumpulan penganan antarabangsa.

Kumpulan penganan antarabangsa itu, kata Jatswan, menggunakan aktiviti jenayah sebagai satu cara untuk mengumpul sumber kewangan bagi membiayai aktiviti kumpulan mereka.

"Ia semua berkait-rapat. Jadi untuk membasmi keganasan, mereka perlu memutuskan pelbagai rangkaian jenayah yang lain," katanya dan menegaskan kejayaan menangkap seorang dua penganan juga tidak bermakna operasi kumpulan itu lumpuh secara keseluruhannya.